



BIMM-BAMM..... STILLER

Mr dien s Joor 2030 schriibe
yberall herscht numme no liesligs triibe
s isch viertel vor vieri demorge
am 11de Merze und mr hän ganz grossi Sorge
d Stiller sin jetzte an dr Macht
und Sorge derfir as es nimme Dätscht und Gracht
dr Major flüschtered e jedem lieslig ins Oor
steend i und passed uff s isch viertel vor
d Stäggeladärne und d Lambbe dien prächtig liechte
rund um mi umme isch muxmüusli stills driibe
do gseen i grad no Söffeli
in iihre scheene Filzpandöffeli
und nääbe dra dr Edi
är macht yberhaupt e kai Komeedi
dä griesst mi lieb und frindli
in sinne schwarze Tigerfinggli

s Liecht isch wägg, mer marschiere ab
Richtig middleri Brugg, d Rhygass durab
do gseeni und due de Auge nimme draue
d VKB sin jetzt nur no Fraue
im Innerschte nit zfiende aber still
will das dr Stiller so will....
wägge dämm Killer mirer is dugg
und traage d Inschtrunänt im Sagg odder uf em Rugg
e so wie allewyl isch es laider nimme
as me ka d Drummle spanne und d Piccolo stimme
as Basler fültsch di nim so wool
dängsch nur no zrug an dozemool
e soone Saich
dr jetzig Morgestraich !

Wie het Das e so wyt kenne koo
as mer numme no still mien ummestoo
im Joor zweiduusig und säx foot alles a
s d Albedoor kunnt as erschetes dra
will e Stiller d Glogge nim vertraage ka
är wird firs ganze Lääbe e Schaade ha
me git däm arme Ma denn laider rächt
will me maint das Gebimmel sigi schlächt
schpeeter kunnt d Martinskirche dra
obwool e Jede waiss ob Frau ob Ma
as uf dääre ganze Wält
kains so scheen wie s Martinsglöggli schällt
d Ueli wärde grundsätzlig alli verbotte

d Hiiser duet me vo inne no uuse abschotte
nimm erlaubt sin au Draggdoore
au die schaade unsre Oore
und es isch yberhaupt nit glooge
d Wääge wärde nimme zooge
die Glaine aber au die Groose
mien jetzte d Waggis sälber stoose
me duet is sogar zwingen
as kai Muggs no usse derf dringe
am Strooserand stoos Comité in Galosche
sin still und halte iiri Gosche
sogar s Singe dusse isch schlächt
so stoos im neye Stiller Rächt

fir d Khie gits e neye Gägg
me nimmt ene alli Dreiche n ewägg
dr Giggel mit sinere ganze Sippe
mues iine nit nur wäge dr Vogelgrippe
me macht sich um d Menschegsundheit Sorge
dä giggered jo scho ganz frie demorge
s git Richter wo sträng kontrolliere
und sofort alles sanktioniere
wemme numme e glai Grüscht duet heere
wo dr Stiller-Glään wurd steere
duesch dr näggscht Joor e Fasnachts Blaggette zue
griegsch grad no Ghörschutzpröpfe derzue

O Frau Fasnacht du gueti Hutte
was muesch Du so alles schlugge
mir Basler dien mit Dir dängge
zem unsri Fasnacht widder ins Guete z längge